

REGIONAL NEWS BULLETIN

HEADLINES (EVENING)

- 1. Aizawl atanga Lengpui Airport panna kawng Sihhmui kaia Tlawng Lei dawh that hna thawh mek chu vawiin khan a thir ruangam dawh kai a ni.
- 2. Kum 2025-26 sikul kumthar atan vawiin khan Zirna in hrang hrangte hawn tan a ni .
- 3. Sawrkar laipui chuan petrol leh diesel-a excise duty a lak chu cheng 2 in a ti sang dawn.
- 4. Vawiin World Health Day puala a thuchahah Prime Minister Narendra Modia chuan sawrkarin hriselna leh damlo inenkawlna lam ti hmasawn turin theihtawp a chhuah chhunzawm tih a sawi.



LENGPUI BRIDGE

Aizawl atanga Lengpui Airport panna kawng Sihhmui kaia Tlawng Lei dawh that hna thawh mek chu vawiin khan a thir ruangam dawh kai a ni.

Tlawng lei ruangam hi vawiin khan dawh niin a tahtawlin nawr pheii a ni a, chawhnu dar 1 rik hma deuh khan tluang taka dawh zawh a ni.

Lengpui Airport kalkawnga lei dawh chungchangah hian Aizawl SP chuan thuchhuahin April ni 6 leh ni 8 inkarah lirthei eng chi mah kal tlang phal a ni dawnlo a ti a, Lengpui Airport leh Mamit lama kal tur ten Buichali lama kal a ngai dawn tih sawiin thupek chu mipuite zawm turin a ngen tih a sawi bawk.

Aizawl atanga Lengpui Airport panna kawng Sihhmui kaia Tlawng Lei dawh hna hi nikum lam atangin ngawrh taka thawh alo ni tawh a, nikum december thla khan load test a nih laiin a Lei khai kangtu cable pakhat a chah avangin lei dawhkai hna chu hun engemaw chen a khaihlak a, a helna kawngah LMV chin hnuai lam tan kal theiha siam niin Motor lian chu Buichali lama kal tura tih anlo ni tawh a ni.

Voicecast

Aizawl atanga Lengpui Airport panna kawng Sihhmui kaia Tlawng Lei dawh hi nikum October ni 30 atanga November ni 30 inkara zawh hman tura ruahman ni mahse nikum khan lei dawh kai an tumna lamah lei khai kangtu a chah avangin lei dawh hi hun engemaw chen a khaihlak rih a, kuminah Lei dawh kai tuma nasa taka hmalak thar niin vawiin khan Lei ruangam chu hlawhtling taka dawh a ni a, PWD chuan an thu ngaichang hrâm turin mipuite an ngen tih sawiin an harsatna chu hriatthiampui turin an duh tih an sawi bawk.



ATL ROAD ISSUE

Lunglei West bialtu MLA Pu T. Lalhlimpaia’n Aizawl atanga Lunglei panna kawng ATL Road siam chu an mawhphurhna anih angin an siam dawnlo anih chuan MLA atanga chawlh a hrehlo tih a sawi.

He thu hi vawiina ZPM Southern Hqtrs. Lungleia chhung inkhawmah sawiin Pu T. Lalhlimpaia chuan Thenzawl kaltlanga Aizawl leh Lunglei inkar kawng siam chu a bilha tho lo anih avangin ruahmanna mumal tak a awm a ngai tih sawiin theihtawpin Lunglei kawng a that theih nan hma an la a ti a, Lunglei mipuite mangang lo tura chahin Lunglei kawng siamthatna tura sum ruahman cheng vbch 90 leh nuai 69 chu Lunglei division pawisa vek anih loh avangin Aizawl khawchhung kawng siam that nan cheng vbch 44 leh nuai 80 dah ani a ti a, ATL Kawng siam chhunzawm zelna tur chu sawrkarin a ngaihtuah dawn a ni a ti.

Lunglei West MLA chuan Hmuifang Division-a pawisa tang pung awm chu, Lunglei divisionah hman a nih theih nan hotute hnena an thlen thu sawiin he kawng hi haw haw chiam a, innawr a, a hunlaia Lunglei mipui demand a sosan avanga siam anih thin avangin hmanhmawh taka siam ani zelin a lang a, chuvangin tun tuma kawng siam turah hian Lunglei mipui te tuarchhel in, hna thawk thei turin hmun kian se a duh tih a sawi a ni.

ATL Road repair work hi Firm leh Company engemaw zatin an thawk tawh a, he kawng hnathawktu hrang hrang te a kawm tih MLA chuan sawiin, ATL Road contract hnathawh hi hrehawm an ti tlang hle a, chuvangin contractor pawh hi tlawmngaia lo in ngen te pawh an nei nawk tawh thin a ni awm a ni a ti

Aizawl atanga Lunglei panna kawng siamna tur sum pawhpen chungchangah hian tun thla ni 4 khan MZP Lunglei chuan thuchhuah samin a hmanna tur dik taka sum hman anih theih nan sawrkar an ngen thu an sawi a, vawiina an thutkhawm lehna ah ATL road siamna tur sum pawh pen duhloh lantir nan Nilaini-ah Mizofed kawt Venglai-ah chhuahkhawm nise an ti a ni.

April ni 5 khan Lunglei Thalai Pawl chuan ATL Road chungchanga PWD Minister Pu Vanlalhlana thusawiah an lungawiloh avang leh Lunglei kawng tha an nghahhlelh laia sum pawh pen ani chu an lungawiloh thu an sawi a,

PWD Minister Pu Vanlalhlana chu a mualpho nasat hmaa inhnukdawh tura an duh thu sawiin kawng chungchangah an beisei a phalo hle an ti bawh.

Chhim lam tlang dung fanga thang mek PWD Minister Pu Vanlalhlana chuan vawiin khan Sangau leh a chhehvel khuate tlawhin hmasawinna tur hrang hrang a sawipui a, Pu Vanlalhlana hian MZP Lunglei in lungawilohna lantir an tum ni April ni 9 chawhnu dar 2 ah Lunglei Press Club ah Press Conference a ko a ni.

<><><>

SCHOOL RE OPEN

Kum 2025-26 sikul kumthar atan vawiin khan Zirna in hrang hrangte hawn tan a ni a,

School tinah buaina leh harsatna awm lovin tluang takin bul tan ni a thudawn a ni a, Hmun tam takah chuan school luh hmain admission hi tihfel a ni a, hmun thenkhatah erawh chuan school luh tan tirhah pawh admission hi la

tih chhoh zel a ni a, tunkar tawp lamah chuan school kai zat tur ang angte chu an inziah luh fel beisei a ni.

Session bul tan niah hian chawchhun pawh dan pangngaiin sem leh nghal a ni a, school hrang hrangah hian zirlaite hriat tur kaihhruaina inhrilh hriat nan leh inchinfel nan hman a ni.

Mizoram School Education Department Director Pi Angela Zothanpuui chuan kum 2025-2026 Academic Session atan Mizoram pumah harsatna awm lovin tluang taka school hrang hrang hawn a ni chu lawmawm a tih thu a sawi.

Byte: Pi Angela

UDISE-in a chhinchhiah hnunun ber, kum 2023-2024 Academic Session chhung khan Mizoram pumah zirlai nuai 2, sing 9, 183 an awm a, chung zinga zirlai nuai 1, sing 2, 4185 te chu sorkar school a lut te an ni a, Aided school-ah zirlai sing 2, 7067 an awm a, Private school-ah zirlai nuai 1, sing 3, 7628 awmin, central sorkar school-ah zirlai 1303 an awm bawk a. Mizoram pumah Zirtirtu sing 2, 2812 awmin, sorkar school-ah sing 1, 2986 an awm a, Aided-ah zirtirtu 2561, Private school-ah zirtirtu 7192 leh Central school-ah zirlai 73 an awm a ni.

<><><>

SSA FREE TEXT BOOK

Samagra Siksha-in zirlaite tana zirlaibu a thlawna sem thin chu waviin zirna in hawn tanni khan zaa 85 a pe chhuak tawh.

Samagra thuneituten Akashvani Corr an hrilh danin, kumin pawl 1 atanga pawl 8 inkar zirlaibu chu nikum school enrollment atanga chhutin Printing and stationary dept atangin an dawng kim tawh a, zirlaibu zaa 85 chu District office ah an pe tawh a, district office te chu school hawn hmain pe chhuak vek turin an hriattir a ni. Hetihlai hian zirlai zingah sorkar school a inziak lut lehkhahu dawn hnua private school a insawn te an awm leh thin avangin Zirlaibu la pek chhuah hmabak zaa 15 chu kumin school enrollment tih chian hunah an pe chhuak chauh dawn a, tunkar chhunga tih chian hman an tum thu an sawi a ni.

Samagra in a chhinchhiah danin, nikum khan sorkar school leh SSA-ah zirlai naupang nuai 1 leh sang 1 vel an awm a, Early childhood care & education, ECCE, pre-primary ti a sawi bawkah zirlai naupang 8000 an awm bawk a, pre-primary tana zirlaibu te hi zaa za an pe chhuak tawh thung a ni.

<><><>

ZPM

MLA Pu Lalmuanpuia Punte chuan raltlante chungchangah ngaihtuahna sen angai a, eizawna an mamawh vea ruahmanna fel tak nena enkawl an ngai a ti.

Wawiina ZPM Party chhung inkhawm Aizawl-a ZPM Gen Hqr office a neihah thusawiin Pu Lalmuanpuia chuan raltlante chu mihringpuite an nih bakah Zohnahthlak unaute an ni a, thil duhawmlo a thlen apianga raltlante mawhpah thin pawh a dik vek lo thei a, YMA ten theih tawpa hma an lakna a chhuanawm hle a ni a ti.

Adviser to Chief Minister (Political) Pu Lalmuanpuia Punte chuan mahni mihringpuite nen khawsak ho thiam a pawimawh a ti a, thih hnu piah lam a pawimawh ang bawkin khawvela mihringpuite nen khawsak ho thiam a pawimawh hle a, politics a Pathian ram tundin a nih theih nan mahni mihringpuite hmangaih kawnga tan lak hi a tul hle a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

RS MP

Rajya Sabha MP Pu K Vanlalvena chuan vawiin khan Sairang Railway Station tlawhin, Hortoki thleng tunah rail a kal thei tawh a, Hortoki atanga Kawnpui thleng pawh commission theih tawh a ni a. Mualkhang thlengin zawhfel ani tawh tih a sawi.

Parliament session tûn thla ni 3-a neih zawh taka tel Rajya Sabha MP Pu K. Vanlalvena chu vawiin khân Lengpui Airport-ah lo tumin a haw kawngah Sairang Rel Station hi a tlawh nghal a, Deputy Chief Engineer Aizawl NF Railway Harjimal Meena-a'n a lo dawngsawng a, he hunah hian thusawiin MP chuan, Bairabi atanga Sairang inkâr km 51 leh tlêm hi hna zawh thlenga pawisa senso atâna santioned zât chu cheng vaibelchhe 8,215 a ni a, tûn thlenga hman zawh tawh zat chu cheng vaibelchhe 7,714 a ni tawh a, hemi huang chhûngah hian zawh ngei beisei a ni tih a sawi.

Pu K. Vanlalvena chuan, Zin veivah nana tlâwm ber rail kawng Mizoramin a nei thei dawn ta chu lawmawm a tih thu sawiin, tunah hian helai hi rail kawng tâwp ber ni rih mah se, Mizoram dung hrûta Zochachhuah thlenga railway siam hi central sorkar thiltum a ni, a ti.

<><><>

FUEL

Sawrkar laipui chuan petrol leh diesel-a excise duty a lak chu cheng 2 in a ti sang dawn. Hetihrual tuialhthei company te chuan excise duty ti sang mahse mipuite hnena hralhna retail price erawh tihsan a ni dawn lo an ti a. Union Petroleum and Natural Gas Minister Hardeep Singh Puri chuan tuialhthei chhiah lak tihsan hi consumer ten an tuar lo ang tih a sawi.

Union Finance Ministry chuan tuialhtheia chhiah lak tihpun hi naktuk atanga hman tan tur anih thu a sawi.

Union Minister chuan LPG cylinder pawh bur khatah cheng 50-a tih san anih tur thu apuang a. Ujjwala hmangtute tan bur khatah cheng 550 niin midang tan bur khatah cheng 853 a ni ang.

<><><>

PM

Vawiin World Health Day puala a thuchahah Prime Minister Narendra Modia chuan sawrkarin hriselna leh damlo inenkawlna lam ti hmasawn turin theihtawp a chhuah chhunzawm tih a sawi.

Pu Modia chuan hriselna chu ram indinchho mek tana pawimawh tak anih thu a sawi bawk a ni.

(Byte)

World Health Day hi khawvel pumah hman niin taksa hriselna ngaih pawimawh a tul zia inhrilh tharna ni atan hman thin a ni.

<><><>